

Uunga siunnersuut: Meeqqanut tapiissutit pillugit Inatsisartut inatsisaata allangortinnera pillugu Inatsisartut inatsisaat nr. xx, xx. xxx 2018-imeersoq.
(Naatsorsuinnermut periaaseq nutaaq, aningaasarsiat akileraarutaasussat maannakkorpiaq aningaasarsianit taarserneqarput aamma procenti aaqqiissutissaq atorlugu meeqqanut tapiissutit aaqqiivigineqartarneri)
(Peqqissutsimut, Isumaginninnermut Inatsisinillu Atuutsitsinnermut Naalakkersuisoq)

pillugu

Ilaqutariinnermut Peqqissutsimullu Ataatsimiititaliap

siunnersuutip aappassaaneerpeqarneranut

ISUMALIUTISSIISUTAA

Ataatsimiititaliap suliarinninnermini makku ilaasortarai:

Inatsisartunut ilaasortaq Laura Táunâjik, Siumut, siulittaasoq
Inatsisartunut ilaasortaq Stine Egede, Inuit Ataqatigiit, siulittaasup tullia
Inatsisartunut ilaasortaq Jess Svane, Siumut
Inatsisartunut ilaasortaq Aqqaluk Heilmann, Atassut
Inatsisartunut ilaasortaq Malene Vahl Rasmussen, Demokraatit
Inatsisartunut ilaasortaq Mikivsuk Thomassen, Inuit Ataqatigiit
Inatsisartunut ilaasortaq Sara Olsvig, Inuit Ataqatigiit

UKA 2018-imi ulloq 11. oktober 2018-imi siullermeerinninnerup kingorna ataatsimiititaliap siunnersuut sukumiisumik misissorpaa.

Siunnersuutip imarisaa siunertaalu

Siunnersuutigineqartoq meeqqanut tapiissutit pillugit Inatsisartut inatsisaata atuuttup allangortinneqarnissaanut siunnersuutaavoq. Siunnersuummi siunertarineqarpoq meeqqanut tapiissutit pillugit inatsimmi meeqqanut tapiissutit naatsorsorneqartarnerat maleruagassiuunneqarnissaallu pillugit 2017-imi tunngaviusumik aalajangersarneqarnissaat. Ukiumi naatsorsuiffiusumi pineqartumi procenti aaqqiissutissaq ilanngullugu 2017-imi akuerineqarpoq.

Siunnersuutip Inatsisartunit siullermeerneqarnera

Siunnersuummik siullermeerinnermi allassimavoq siunnersuut tunngaviusumik partiinit tapersorneqartoq.

Tusarniaaneq

Siunnersuut piffissami pineqartumi www.naalackersuisut.gl-ikkut tamanut tusaniaassutigineqarnerata saniatigut, siunnersuummut nalinginnaasumik oqaaseqaatini tusarniaanermi illuatungeriit oqaatigisaat piffissami junip ulluisa 14-ianiit julip ulluisa 6-iannut 2018 siunnersuutigineqartoq una tusarniaassutigineqarsimasoq ataatsimiititaliap maluginiarpa.

Tamanna ataatsimiititaliamit tamakkiisumik tusaatissatut tiguneqarpoq, taamaattoq maluginiarlugu siunnersuutip imarisaa apeqqutaatillugu tusarniaanermi piffissarititaasoq sapaatit akunnerinik sisamanik sivilisunerusumilluunniit sivilisussuteqartariaqarualuartoq.

Apeqqutit

Ataatsimiititaliap siunnersuummik suliaqarnermini meeqqanut tapiissutit ukiuni 15-ini kingullerni akigititat aalajangersarneqarsimanerat pillugu apeqqutit arlallit akineqarnissaat siunertarlugu Peqqissutsimut, Isumaginninnermut Inatsisinillu Atuutsitsinnermut Naalackersuisoq qinnuigaa. Peqqissutsimut, Isumaginninnermut Inatsisinillu Atuutsitsinnermut Naalackersuisup akissuteqaataata assilnera isumaliutissiisummut matumunnga ilanngussaq 1-itut ilanngunneqarpoq.

Meeqqanut tapiissutit qaffallattaarneqartarsimasut tamatumali akinut aningaasarsiallu ineriartorerannut sanilliullugu iluarsivigineqarneq ajorsimaneri ataatsimiititaliamit maluginiarneqarpoq.

Naalackersuisut akissuteqaataat ataatsimiititaliamit tusaatissatut tiguneqarpoq, taamaattoq ataatsimiititaliap apeqquteqaataanut 4-mut akissuteqaammut tunngasoq pinnagu, matumani meeqqanut tapiissutit malittarisassiuunneqarsimannginnerisa kingunerisaanik nalikilliarforsimanerisa nalimmassarneqarnissaat qanoq naleqassanersoq ataatsimiititaliamit apeqqutigeqqinneqarmat.

Pineqartup Naalackersuisunit nassuiaatigineqassasoq ataatsimiititaliamit aammaarlugu qinnutigineqarpoq, tamannami pillugu ingerlaavartumik isumaqatigiinniartarnernut isumaginninnikkullu ikiorsiissutinut tunngatillugu naalackersuinikkut soqutiginaateqarmat.

Ataatsimiititaliap siunnersuummik suliarinninnera

Siunnersuutip siullermeerneqarnerani tunngaviusumik tapersorsorneqarnera ataatsimiititaliamit paasineqarpoq, siunnersuummillu suliaqarnermi siunnersuummut tunngaviusumik tapersersuisoqarneranut allannguissamut pissutissaqarani.

Taamaakkaluartoq tapiissutit annertussusaat sullitallu pillugit ingerlaavartumik naalackersuinikkut nalilersuisoqarnera ataatsimiititaliamit akuersaarnartinneqarpoq,

tamatumalu kingunerisaanik sapinngisamik siumut isigisumik aaqqiissuteqartarnissap aalajangiusimaneqarnissaa eqqumaffigineqartariaqarluni.

Siunnersuutip aningaasatigut kingunerisassai

Siunnersuutip piviusunngortinneqarnissaanut pisortanut aningaasatigut kingunerisassai siunnersuummi nalinginnaasumik oqaaseqaatini allaaserineqarput. Tassani allaaserineqarluni siunnersuut Nunatta Karsianut annikitsumik aningaasartuutaanerussasoq, tassami meeqqanut tapiissutitut procenti aaqqiissutissaq atorlugu ukiumoortumik aaqqiissuteqartarneq eqqunneqassammat. Siunnersuut akuerineqassaguni aningaasartuutaanerujumaartut eqqortut maleruagassat naapertorlugit august 2019-imi tamanut saqqummiunneqartussat malittussaavaat.

Innuttaasunut aningaasatigut kingunerisassanut tunngatillugu nalinginnaasumik oqaaseqaatini Naalakkersuisut oqaatigaat:

”Meeqqanut tapiissutit akit nalingannut procenti aaqqiissutissaq atorlugu ingerlaavartumik aaqqiivigineqartarnissaat siunnersuutip kingunerisavaa. Tassuunakkut meeqqanut tapiissutit akit akissarsiallu allanngoriartornerannut malinnaalissapput. Taamaammallu aningaasat naleerukkiartornerat pissutigalugu siunissami angajoqqaat pitsaannerusunik atugassaqalissapput.”

Naalakkersunit oqaatigineqartoq ataatsimiititaliamit paasineqarpoq tusaatissatullu tiguneqarlugu.


Ataatsimiititaliap inassuteqaataa

Siunnersuut ilusimisut iluseqartillugu akuerineqassasoq ataatsimiititaliap isumaqatigiittup inassutigaa.


Taama oqaaseqarluni isumaliutissiisummilu oqaatigineqartunut paasinnilluni siunnersuut ataatsimiititaliap aappasaaniigassanngortippaa.



Stine Egede
Siulittaasup tullia



Laura Táunâjik
Siulittaasoq



Jess Svane



Aqqaluk Heilmann



Malene Vahl Rasmussen



Mikivsuk Thomassen



Sara Olsvig



Uunga

Ilaqutariinnermut Peqqissutsimullu Ataatsimiititaliaq

Ilaqutariinnermut Peqqissutsimullu Ataatsimiititaliap meeqqanut tapiissutit pillugit apeqqutaanut akissutit.

21-10-2018
Sags nr. 2018 - 21574
Akt. id. 9023771

Ilaqutariinnermut Peqqissutsimullu Ataatsimiititaliaq tulliuuttuni taaneqarsimasunik apeqquteqarpoq:

Postboks 260
3900 Nuuk
Tlf. (+299) 34 50 00
Fax (+299) 34 66 66
E-mail: iian@nanoq.gl
www.naalakkersuisut.gl

1) Ukiut 15-t kingulliit iluini meeqqanut tapiissutit qanoq annertutigisumik aaqqiivigineqarsimappat?

Ukiut kingulliit 15-it iluini ukiumoortumik meeqqanut tapiissutit annerpaaffiat aningaasanut inatsimmi aalajangerneqartarpoq, ingerlaavartumillu aningaasartat akinut malinnaanissamut aaqqiivigineqartarsimanatik. Tabelimi ataani allaqqasumi takuneqarsinnaavoq meeqqanut tapiissutit annerpaaffiisa ineriartorsimaneri.

Meeqqanut tapiissutit ukiumoortumik annerpaaffii								
Aningaasanut inatsit	2003	2004	2005	2006	2007	2008	2009	2010
Koruunit	4.860	5.610	5.610	5.610	6.110	6.110	7.637	7.637
Aningaasanut inatsit	2011	2012	2013	2014	2015	2016	2017	2018
Koruunit	7.637	7.637	7.637	8.477	8.477	8.477	8.477	8.477

2) Ukiut 15-t kingulliit iluini qanoq annertutigisumik akinut aningaasarsiallu ineriartornerinut malinnaasimangillat?

Meeqqanut tapiissutit annerpaaffii maannakkumut ingerlaavartumik akinut malinnaatinneqarnissaannut aaqqiivigineqartarsimangillat, kisianni aningaasanut inatsimmi aalajangerneqartarsimallutik. Taamaattumik meeqqanut tapiissutit ukiut tamaasa akinut malinnaanissamut aaqqiivigineqartarsimangillat.

3) Meeqqanut tapiissutit siumut isigisumik qaffaavigineqarnissaasa qulakkeerneqarnissaa pillugu suliami matumani Naalackersuisut takorluugaqarpat? Aningaasat naleerukkiartornerisa kingunerisaanik, akit aningaasarsiallu ineriartornerinut atatillugu ukiut 15-t kingulliit iluini aningaasat naleerukkiartornerisa nalimmassarneqarnissaat matumani siunertarineqarpoq?

Meeqqanut tapiissutit aaqqissuussivigeqqinneqarnerat 2018-imi atuutilerpoq. Maannakkuugallartoq aaqqissuusseqqinneq 2018-imut Aningaasanut inatsimmi oqaasertaliussatigut timitalerneqarpoq.

UKA 2018-imi Meeqqanut tapiissutit pillugit Inatsisartut inatsisaat nr. 9, 7. december 2009-imeersumut allannguutissatut siunnersuut saqqummiunneqarpoq, taamaalilluni aaqqissuusseqqinneq Aningaasanut inatsimmi allaaserineqartoq massakkut meeqqanut tapiissutit pillugit inatsimmi ilanngunneqartussanngorluni.

Meeqqanut tapiissuteqartitsinermik aaqqissuussinerup aaqqissuussivigeqqinneranut atatillugu, qaqugukkut meeqqanut tapiissutit appariartuaartinneqartarnerannut isertitanut killissarititaasut, ilaqutariinnut meerartalinnut tamanut qaffanneqarput. Taamaammat ilaqutariit meerartallit, isertitaat allanngorsimatinnagit, ukiunut siuliinut naleqqiullugu ullumikkut meeqqanik tapisiaqartinneqarnerusalerput.

Ataatsimut isigalugu aaqqissuusseqqinneq aqutigalugu ilaqutariinnut meerartalinnut atugassarititaasut pitsanngorsarneqarput.

Nutaatut UKA 2018-imi imm. 17-imi inatsisissatut siunnersuutigineqartumi aalajangersarneqassaaq meeqqanut tapiissutit, isertitassanullu killiliussat siunissami procenti aaqqiissutissaq atorlugu ukiumoortumik aaqqiivigineqartalissasut, soorlu isumaginninnermi ikiorsiissutit tunniunneqartartut allat amerlasuut taamaaliorneqartartut. Taamaalilluni meeqqanut tapiissutit siunissami akit- akissarsiallu ineriartornerat malinnaaffigilissavaat taamaalillutillu siunissami nalikillinissaagaluaq pinngitsuussallugu.


4) Apeqqutitut 1-mut 3-mullu atatillugu, meeqqanut tapiissutit annertussusaasa aaqqiivigineqarnissaat naalakkersuinikkut kissaatigineqassappat ukiumut qanoq akeqassanersoq paasissutissiissutigineqarnissaava, taamaaliornikkut ukiuni 15-imi kingullerni aningaasat naleerukkiartornerat aningaasatigut taarsiissuteqarfigineqarsinnaaqullugu?

Meeqqanut tapiissutit 2003-imi piviusumik nalingisa 2018-imi nalingi assigneraat pillugit naatsorsuisoqarnikuunngilaq. Meeqqanut tapiissutit ilaqtariinnut meerartalinnut tunniunneqartut, meeqqanut tapiissutit annerpaaffissaat aamma appariartuaartitsinissamut isertitanut killissarititaasut aalajangerneqarneri apeqqutaatillugit annertussuseqartarput. Appariartuaartitsinermut isertitanut killissarititaasoq qaffasippat, taava meeqqanut tapiissutit tunniunneqartartut amerlanerussapput. 2003-imi aamma 2018-imi meeqqanut tapiissutit piviusumik assersuunneqassappata suliaq annertooujussuusaaq, taamaalillunilu 2003-imi 2018-imilu ilaqtariit meerartallit meeqqanut tapisiat pisaasa nalingi piviusut aalaavigineqassallutik.

Meeqqanut tapiissutit qaffanneqarnissaannut aningaasaliissutinik amerlanerusunik piumasaqartoqassappat, taava aningaasaliussassat nassaariniarneqartariaqarput. Aningaasartuutaanerusussarlu taanna aningaasanut inatsisissap isumaqatigiinniutigineqarnerani ilaatinneqassaaq.

Inussiarnersumik inuulluaqqusillunga

Med venlig hilsen



Erik Jensen